

Saturday, February 28, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

VIKSIT BHARAT YOUTH PARLIAMENT

Viksit Bharat Youth Parliament 2026 – District Level 50 Years of Emergency : Lessons for Indian Democracy" tih thupui hmangin vawiin khan Govt. Champhai College ah Mera Yuva Bharat Champhai leh Govt Champhai College tangkawp ten ram hmasawna atana thalaite mawhphurhna hrang hrang zirhona an buatsaih.

Champhai College Principal Dr C Laldawngliana chuan Viksit Bharat Youth Parliament 2026 chu nikum lamah an lo kalpui tawh thu sawiin a thil tum chu thalaite ram rorelna a tel tura inbuatsaihna anih thu sawiin, Ram rorel naah thalaite an tel ve theihna tur a ni a ti a. Sawrkar laipui chuan kum 1960 atanga hmathlir a lo neih tawh thu sawiin ram rorelna ah thalaite dah pawimawh an ngaih thu a sawi.

Principal chuan District atangin State Level, National Level thlengin an kal dawn tih sawiin, a vannei leh ti tha bik te tan parliament ah thu sawina hun a awm thu a sawi a, kalkhawm te chu mahni inring tawk tura chahin ram tana thil tih neih tum theuh turin a chah bawk.

Viksik Bharat Youth Parliament ah hian GOVT. Champhai College-a VI semester English, Political Science leh Education zirlaite an intihsiak a, min 3-5 chhung hun pek an ni. Thupui atan "Reflect on the 1975 Emergency, its impact on democracy, and lessons for today's India" tih hman a ni.



CYMA

Central YMA President Pu R. Lalnggheta'n nizan khan Lengpui YMA Hall-ah YMA kumpuan 'Ruihhlo Do' a hawng a; Central YMA hnuaiia ruihhlo do pawl Central Anti-Drugs Squad (CADS) chuan karhmasa Inrinni atanga nimin thleng khan ruihhlo engemawzat manin, hemi kaihnawihah hian mi 76 an man a ni.

Lengpui YMA Hall-a YMA kumpuan a hawnaah Central YMA President Pu R Lalnggheta chuan, ruihhlo ngaite enkawl turin tanrual a tul thu a sawi a, ruihhlo do kawngah theihtawpa tanrual a tul thu a sawi a, YMA hruaitute chu an kut fai a tul thu sawiin, hluihlawn thil la lo turin a fuih a; ram chhan nan tlawmngai pawl mai bakah kohhran leh mipui tanrual a pawimawh thu a sawi bawk.

Central YMA hnuaiia Central Anti-Drugs Squad hian karhmasa Inrinni atanga nimin thleng khan, kar khat chhungin ruihhlo chi hrang hrang - heroin (No.4) hawng 10 leh tictac bur 111, ganja kg 10 leh gram 196 leh damdawi thahnem tak an man a, Heng ruihhlo an man kaihnawihah hian mi 76 man niin, heng zinga mi 5 hi Excise & Narcotics Department hnenah an hlan a, home-ah mi 3 an dah bawk.



SERCHHIP SUB-HEADQUARTERS YMA

Nizan khan Serchhip DC Pu Paul L Khuma chuan Sub-Headquarters YMA, Serchhip buatsaih kumpuan Ruihhlo Do hawnna hun a hmanpui.

DC chuan ruihhlo do kawnga YMA hmalakna fakin, police leh excise department nen tha taka an thawhhona avanga a lawm thu a sawi a. Ruihhlo ngai ten an sim theihna tura tha thlah loa tang zel tur leh, a la ti ve ngai lo ten an tihchhin lohna turin mahni inchhung atanga bul tan theuh turin kalkhawmte a sawm a ni.

Additional SP Pu H Laldyata pawhin YMA member ten ruihhlo do kawnga sawt zawka hma an lak theih nan sawrkar dan te leh hriattur pawimawh a sawi fiah a, Kumpuan hawnna programme ah hian Serchhip Sub-Headquarters YMA Pu Kawlthuama pawhin fuihna thu a sawi a ni.



HNAHTHIAL DISTRICT CONSUMER UNION

Hnahthial District Consumer Union hruaitute vawiin khan Sawrkar hotute nen Hnahthial khawchhunga chawhmeh zuar te leh Sa zuar an endik a, an rate leh an bukrate endik sak niin bukna fello leh buk lung fello te chu, an bukna leh an buk lung thlak thar tura tih an ni.

Endikna ah hian Sa rate chu Sawrkarin a bituk anga hralh tura ngen an ni a, Sawrkarin rate a siam sa nga Sa rate hralh lo an awm anih chuan, an chungah na taka action lak a ni dawn tih chu Mipuite hrilhhriat thar leh niin Sawrkar rate siam sa anga Sa zuar lo Hnahthial District chhungah an awm chuan Hnahthial District Consumer Union hruaitute hma an la zel dawn an ti a, chawhmeh man pawh mumal zawka a kal theih nan theihtawp an chhuah tur thu an sawi a ni.



UNION MINISTER

Union Minister Sarbananda Sonowal chuan Brahmaputra luidunga inkalpawhna tur hmalakna hrang hrang pathum a hawng.

Nimina Dubrugarh, Assam-a hawnna hun hmanah hian Union Minister of Ports, Shipping and Waterways Pu Sarbananda Sonowal chuan ramchhunga luidung inkalpawhna tih hmasawna tur project pawimawh tak tak chu Brahmaputra luidunga kalpui turin a hawng a, Prime Minister Narendra Modi kaihhraina hnuai hmasawna thar 'Vikas and Virasat' anih thu a sawi.

Union Minister chuan sawrkarin luidung inkalpawhna tih hmasawn kawngah theihtawp a chhuah tih sawiin ramdang nena insumdawn tawna kawng pawimawh tak ani dawn ati a, hei hian tualchhunga eizawna mi tam tak a siam sak dawn tih sawiin hnam ziarang hlutna ti zualtu a ni zel dawn a ti a, hmalakna thar chuan hmarchhak hmasawna kawngah rahbi thar a siam sak ngei a beisei tih a sawi bawk.

Union Minister in project a hawn hi Bobigeel leh Dubri hmuna Customs and Immigration Complex sakna tur leh Dibrugarh hmuna IWAI Heritage Building sakna tur te a ni.

